

Naginas reglas novas per l'aur da la Banca naziunala

Naufragi per l'iniziativa davart las reservas d'aur

■ **(anr/vi) La Banca naziunala na sto betg tegnair dapli reservas d'aur e po vinavant magasinar ses aur er en l'exteriur. A moda clera ha il pievel sbittà ier l'iniziativa ch'il trio da la pps Luzi Stamm, Lukas Reimann ed Ulrich Schliuer avevan mess en pe.** «La credibilità da la Banca naziunala è para fitg auta», ha ditg Stamm. Il pievel haja carti a la Banca naziunala ch'il curs minimal tar l'euro fiss en privel sche l'iniziativa vegnia prida.

Malgrà la refusa haja l'iniziativa tuttina gì in tschert success, ha punctuà Stamm. La Banca naziunala haja stuì discuvrir nua ch'ella magasinieschia sias re-

servas d'aur. Il politicher da la pps spera che la Banca naziunala na vendia en l'avegnir betg anc dapli da sias reservas d'aur.

«Il pievel n'ha vulì savair nagut dad aventuras», ha ditg *Urs Gasche*, cusseglier naziunal da la pbd. Cun la refusa clera haja il pievel decidì a favur da l'indipendenza da la Banca naziunala, ha ditg *Karin Keller-Sutter*, cussegliera dals chantuns da la pld.

Nunchapaivel saja cunzunt stà la pretensiun da betg astgar vender l'aur. Ina reserva ch'ins na dastgia betg vender en temps da miserias na fetschia betg senn.